



DEO OPTIMO MAX.  
UNI ET TRINO,

VIRGINI DEI - PARÆ, ET S. LUCÆ,  
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS  
*manè discutienda in Scholis Medicorum, die Jovis quarto,  
mensis Aprilis, anno Domini M. DCC. XLIII.*

M. FRANCISCO MERY,  
Doctore Medico, Præside,

*An salubrior Sequana?*

I.



REGIONES, urbem, sanas nè dixeris quas torridus  
exurit aër, squallor suffocat, infestatque aquarum penuria.  
Dant salubres & indicant serenus æther, Elementorum  
consensus, successiva æqualis & moderata Horarum,  
Dierum, Tempestatum, Annique vicissitudo & misce-  
la, temperata caloris cum frigore libratio, frons ad Orientem  
plurimum directa, amicorum dulcis aura ventorum, vegeta firmi

A

corporis habitudo, color floridus, firmum caput, sensus acuti, quid tandem? Uberior leni cursu properantis aquæ affluxus & sinceritas. Sed aquam nè temerè pronuntiaveris sinceram. Quæ ad hominum sanitatem valeat aqua, non noscitur pondere, non mollitie aestimatur, non judicatur coctione. Intemeratæ bibentium explorentur fauces, celebreturque præ cæteris si cum nullâ pulmonum debilitate, ventriculi pondere, dolore viscerum, alteriusve partis obstructione, coquendis aptissima leguminibus, pani ritè conficiendo nata, cujuscumque sit expers saporis, promptè calori frigoriq; suscipiendo æqualiter parata. Quæ hisce prædita dotibus agnoscetur aqua, salubris & eadem meritò nuncupabitur, eò salubrior quò cumulata magis.

## I I.

**O**R BIS universi compendium Gallia. Famosas suæ ditionis mille inter Urbes, Lutetia non minùs præstantissimorum ferax ingeniorum, quàm magnitudine, numero, ornatu, splendore, opibus conspicua, omnium facilè princeps. Triplieem spectat solis exortum; altioribus & innumeris densissima licèt ædibus, omnium tamèn est, montibus non intercepta, ab ortu & septentrione saluberrimè afflantibus pervia ventis, multum ab Austro & occidente spirantibus averfa. In mediis luti sæculentioris sordium halitibus, in tantâ hominum undique advolantium frequentia, non grassatur tetra lues, pestisve contumax: non frequentius densat funera inexplibilis in otio diversissimorum eduliorum ingluvies: in Incolis nec φιλοπρόνοιο nec φιλογυμναστοιο, sed solâ Scytharum more exercitatis vectione, non inferior Martialibus Romanis emicat animus. Tot mirandorum causam scrutaris avidus? Cæli inter Polum & circulum æquinoctialem fermè medii agnoscas dona, temperatæ soli directionis dotes, fecundissimæ salubriorisque Sequanæ irrigationis munera.

## I I I.

**Q**UIBUSNAM constet elementis aqua quam vehit Rex flaviorum Sequana, scrupulosius inquirent Chimæ sectatores. Sola dux nobis experientia, testes effectus. Quantum hæc cæteris omnibus præcellat, oculato cuilibet quàm facile demonstrabunt Sequana nec alto nimis nec depresso ad Orientem hybernū natus loco, Junnam recipit cancrorum divitem, defluentem ab ortu activo Matronam, Bibaram tandem temperatæ cerevisiæ Tyriisque coloris

bus nulli secundam. Tot onustus divitiis, solaribus ubique expositus radiis, non stagnans ut Garumna, non Rhodani modo furentes præcipitans aquas, non Tiberis instar templa dejiciens & ædes, non segniter torpens ut Arar, æqualis semper, otiosus nunquam vel citior, qualis æstate talis hyeme, tumens rarò detumensque ingreditur Luteriam aspectu gratissimus, amplissimamque civitatem ad triplicem solis exortum dividens tripartitam, uberiori alveo quæ munera non fert, quæ non avertit mala vel præcavet? Fertilitatis, abundantiae, munditiei, annonæ parens est & conservator. Infestas crassioris luti sordes abluit & repurgat, pestiferos cloacorum halitus dissipat & retundit; abstergit squallorem, temperat aërem & renovat, singulisque vitæ beatoris usibus & commodis non impar, levitatem dat pani, debitam coquendis leguminibus largitur molliem, optimum est carnibus condimentum. Sed cum Sequana tot munera dividant cætera quælibet flumina, non alia epotatione certare audeat aqua.

## I V.

**F**ELICES nimirum Parisii si sua bona norint! Quem sincerum fundit Sequana laticem pleno haustu ebibant avidi. Non salubriorem aquam cæteris mortalibus obtulisse benignam rerum parentem naturam conservata diu sanitas evincet; reparata citius. Quid est etenim quod facile parabilis ille liquor incolis beneficii non præstet? Spiritu vitæ turgidus, gratus palato, viscera facile permeans, non gravis Stomacho, Pectoris amicus, sitim fugat protinus & explet; appetitum, quo non exquisitior coquus, excitat & promovet; genus illud quo promptius in ventriculo dividuntur alimenta, concoctio perficitur placidiùs, tutiùs, properat distributio, fluidiorque nascitur chylus dulcis & blandus, puri sanguinis per vasa facili lapsu decurrentis fons innocuus & reparator. Quis potentiùs æstuantès corporis fluidorum compescit impetus? Solidorum sedat spasmos? Nativum sanguini & humoribus instillat vehiculum? Quis meliùs alvum continet mollem, tardior stimulat, aperit urinæ vias, salia dissolvit, calculosis obstat concretionibus, transpirationem secretionum saluberrimam promovet, putredinem arcet futuram, sistit præsentem, dolores mulcet, avertit lentorem, moram rumpit, emollit dura, tensa laxat, involvit acria, nociva foras amandat, dat tandè æquilibrium & servat? Aquæ Sequanæ potatores aspicias? Quis oris nitor, vultus color floridus, oculi fulgor? Ingenii mireris aciem! Vigorem membrorum, corporis mentisque fecunditatem! Ut rariùs ægrotant, sanantur faciliùs,

longamque beati numerant annorum seriem in senectute juvenes.  
Sed obstupescere desinas. Incolis, si cauti, Medicina est universalis  
Sequana.

## V.

**N**E fallacibus verbis temerè credas, clamitat ignara plebs, ferentemque dona timeas Sequanam. Si salubrior, inquit, cur non alibi frequentius quàm Parisiis distorti corporis ingruunt Nævi? Cur mulieres non paucae, succi plenæ licèt, tumentibus protuberant alvis gibberæ sæpius, calculosis viri infestantur concretionibus, herniis tentantur juvenes? Cur contumaces adeò Diarrhææ, Rhumatismi, Arthritides? Stolidum sanè vulgus! Quibus debelletur arma ministrat inscium. Quis, quæso, varos valgosque Ægyptiorum pedes, excedentia labia, crispamvè casariam fertiliiori Nilo tribuerit unquam? Cæteris vix cogniti nationibus incolæ Sequanæ laceßunt morbi? Quid culpas Sequanam? Habitantium incusâ gulam, crassioribus ferculis fatiscientes mentes, condimenta ciborum non inferiora venenis, fatales vini spirituosique cujusslibet liquoris illecebras effrenatam venerem, longiorem somnum, desidisque otia vitæ. Quid valeat Sequana experiri audeant? Tot malis non tutior medela, non præstantius pharmacum. Aquas formident subterraneas, stagnantes, paludosas, puteales, frigidas, nivales. In longam diem infeminant morbos, pestiferoque potu trucidant. Non fontes laudentur Ifiaci, non Bellavillei, non Regniacenses; heu malè plumbeis in universam urbem tubis derivantur crudiores: solus de medio flumine bibatur Sequana, aternùmque concludetur.

*Ergo salubrior Sequana.*

Proponēbat Parisiis, PETRUS CHEVALIER, Rhedonæus, Saluberrimæ  
Facultatis Medicinæ Parisiensis Baccalaureus. A. R. S. H. 1743.  
à sextâ ad meridiem.

---

Typis QUILLAU, Universitatis & Facultatis Medicinæ Parisiensis  
Typographi, 1743.